

wann nun gemelte Zeit bald heran kommt auff eine Minuten 2. 3. nahe / also das es bald halbweg 8. Uhr weiset / so nem ich geschwinde das Astrolabium , vnd halte es geschwinde gegen den gemelten Stern / doch das das Astrolabium frey ledig henge oder schwebe / vnd rücke die grosse Regel so lange auff vnd nieder / bis ich Aquilam durch das unterste vnd oberste Löchlein gewisse sehe / vnd finde / das nur die grosse Regel den 26. Grad abschneidt / wen das gewis geschicht / halte ich das Astrolabium so unverrückt / vnd sehe / wie viel Stundt vnd Minuten der Zeiger an dem Uhrwerck weiset oder deutet / das behalte ich im Sinne / vnd finde 7. Uhr / vnd 34. Minuten / nach diesem schreibe ich auff / wie viel Grad hoch Aquila in der observation , zwische Occasu vnd Meridie , gestanden / nemlich / 26. Grad / die zehle ich auch unter den Almicantharath Circul daselbst vom Occasu , vnd rücke das Punctum Aquilæ im Rete gegen Occasu auff den Almicantharath Circul / welcher 26. grad hoch anzeigt / vñ halte das Rete so fest unverrückt / leßlich rücke ich die kleine Regel im Limbo auff die Stunde vnd Minuten / die das Uhrwerck gezeigt hat / nemlich vmb 7. Uhr vnd 34. Minuten / vnd sehe / was die Regel für ein grad in der Ecliptica durchschneidet / oder anzeigt / welcher ist der  $26\frac{1}{2}$  grad Scorpionis / den suche ich nun hinden am Dorsso , vnd ziehe ein Ende der grossen Regel darauff / das zeiget mir im Calendario den vergessenen Monatstag / nemlich / den 9. Tag Novembris , vnd ist recht / siehe / allhier in diesem mag man Augenscheinlich sehen / wie ein schön herrlich / lieblich vnd nütlich ding es sey / vmb ein recht gewisses Uhrwerck / das gewisse Stunden helt / desgleichen vmb ein gewissen Compas / oder ander dergleichen Mathematisch Instrumentlein / re. vnd wie dieselben eins dem andern zugethan / vñ Handreichunge thun / vnd diese Kunst helffen bestetigen / darunib hoch von nötten were / das auch die Obrigkeiten sonderlich achtung auff ihr Uhrwerck hetten / vñ das dieselbigen möchten fleißig nach der Sonnenlauf / menniglichen zu nutz gerichtet / oder recht gestellet werden / aber jetzt gehets an vielen Orten so zu / das man solchs wenig / ja bald gar nichts mehr achtet / lassen ire Uhren gehen / Gott gebe / sie gehen eine halbe oder eine ganze Stunde zu frue oder zu spete / welchs in Geburtsstunden / vnd andern Astronomischen observationibus , wenn man sich darnach richten wolte / grosse Irrung bringen würde / wie solchs ein jeder Verständiger selbst erachten kan.

Da aber einer diesen Handel noch auff einen andern Weg gebrauchen vnd erfahren wolte / wil ich zu mehrer Übung noch einen andern Weg setzen / Erftlich / muss ich zu diesem Handel ein gewisse unbewegliche Mittagslineam auff einem unbeweglichen Gesimbs Ramen oder Stein / wie im 37. Capittel geleret worden / haben / darnach sol man ein gleich gehobelt Bret / an gemelter Mittagslinea / gerade nach dem perpendiculo auffrecht setzen / also / das die Mittagslinea hart neben dem Brete hergehet / vñ das Bret muss also befestigt werden / damit sichs nicht schlun von der Mittagslinea verrücke / vnd doch gleichwol gerade nach einem hangenden perpendiculo / wie gemeldt / auffrichtig stehe / so ist es zu diesem Handel auch bereit. Nach diesem

Demonstratio.

Nota.

Nutz der Uhrwerck vnd des Compas.

Die Uhren sollen mit fleiß gestellet werden.

Aliud.

Demonstratio.

NB.

H

sol man